

摘藻堂四庫全書薈要

集部

欽定四庫全書薈要

集部

御覽經史講義卷五

詳校官編修臣汪鏞




欽定四庫全書薈要卷二萬五百八十一

集部

御覽經史講義卷五

周易

象曰澤上有地臨君子以教思无窮容保民无疆

右中允臣朱良裘

王弼注曰相臨之道莫若說順也

朱子本義曰地臨於澤上臨下也教之无窮者允也容之无疆者坤也

臣謹按天澤曰履履者以下承上也地澤曰臨臨者以尊適卑也萬物莫不尊天而親地於此可見而王者所以崇效而卑法者皆取諸此矣繫辭曰坤也者地也萬物皆致養焉又曰說萬物者莫說乎澤既說而順臨民之道備矣而彖必以剛浸而長剛中而應釋臨之義者蓋說而順之道必有至健者以主乎其中然後得大亨以正而有合於天之道此卽董仲舒所謂陽常以生育長養為事而

陰常積於空虛不用者也夫麗澤之功朋友資以
講習厚載之德品物納於含宏故曰說言乎兌致
役乎坤是教之无窮容之无疆皆臨民者必不容
已之事乃言教而必係之以思言容而必極之於
保者於以見教非徒提命之諄諄容亦不僅度量
之相越已也黨庠術序所以教民者綦詳而琴書
干羽皆載深宮之德意以周流而後有以感發其
性情而淪浹乎肌髓并疆廬舍以奠其居比閭族

黨以聯其誼制節謹度以厚其生所欲與聚所惡
勿施必使天下之大九州之遠皆有以安其出作
入息之常而遂其仰事俯育之願所謂保之如赤
子而視之如傷也孟子言聖人之教民曰勞之來
之匡之直之輔之翼之使自得之又從而振德之
此可以知聖人之心思無一息不與斯民之日用
飲食相流通而其言保民也舉斯心以加諸彼而
達於家邦訖於四海夫豈有此疆彼界之分與抑

又聞之易之言君子者謂君臨上位子愛下民通
天子諸侯兼公卿大夫有地者而言也然樹之后
王君公承以大夫師長必統於首出庶物之一人
故必有知人善任之能而後克殫作君作師之職
此六五所以言知臨大君之宜也有知周萬物之
能必有仁覆天下之量其積之也至厚而後運之
也不勞此上六所以言敷臨吉无咎也中庸言唯
天下至聖為能聰明睿智足以有臨此知臨之義

也其言德之積於中而見於外者首之以寬裕溫
柔此敦臨之義也然則教思无窮容保民无疆非
知之盡仁之至而全乎自强不息之勇者孰能與
於斯

周易

象曰澤上有地臨君子以教思无窮容保民无疆

侍講臣馮秉仁

胡氏炳文曰不徒曰教而曰教思其意思如允澤之深不徒曰保民而曰容保其度量如坤土之大

臣謹按帝王撫有寰宇海隅向風四方從欲固將舉萬民之衆登衽席敦禮讓臻熙皞之庥而成久道化成之治者也是以首出庶物取象於乾厚德

載物取勢於坤容民畜衆則師之道昌輔相裁成
則泰之爻著為養為教易之說也大備而澤上有
地更取義於臨者其於君民相接之誼殆有愷切
言之者與今夫蒼蒼在上天之臨也終古代明日
月之臨也而莫高匪天日月無私照承乎下者蒙
其覆而忘其德其象則然矣惟夫地上之澤滴滴
必歸無源不濬言乎茹納也有包育之能言乎積
漸也有涵濡之力其氣通其情洽聖人觀象於此

而即以教思无窮容保无疆歸之君子其取義實
宏且摯焉蓋九重之上廉遠堂高而人君痼瘵為
懷則無遠弗届是以莊臨之以威臨之而實以惠
臨之也故夫言教而復言思者言乎條誥訓約之
頒布諸渙汗者為猶淺而委曲開導之意實繫乎
天子之隱憂言保而復言容者言乎蠲租賑貸之
施出之賚予者為曠典而維持調護之能實發於
皇心之肫懇不然一夫不獲時予之辜民未知禮

未生其其將所謂無窮無疆者方諸地澤之義不
大相逕庭乎二典之訓曰食哉惟時敬敷五教三
代以還凜民惟邦本之旨而肇修人紀視民如傷
生其時者承風動歌樂只憂乎尚矣亦越漢唐而
後力田有詔學校有式躬履至道以示四方務茲
稼穡以臻仁遂豈不以民猶水也不拯其流將靡
所極君實臨之風化之行必由近始夫乃以教以
養浹髓淪肌重熙累洽迄百年必世之遙猶戴恩

膏於不替以云教之无窮其思實遠也以云保之
无疆其容乃大也此而揆於地澤之交陰陽之氣
剛柔之用誠有若合符節者君人者果何道而能
幾此哉唐陸贄奏疏云君人之道子育為心雖身
處九重而慮周四表近取諸身如疴癢之關乎四
肢也遠取諸物如品彙之鑒於兩曜也故時有凶
害而人無流亡恃天聽之必聞知上澤之浸至今
試即其說而參究之已飢已溺即教思之思欲立

欲達即容保之容夫教人以善謂之忠何以守位
曰仁忠也仁也豈外假之數哉亦惟端本於君心
之常臨而已矣若廼皇路昇平士民樂業而保民
如赤之衷方且給求養欲之慇慇救弊補偏之急
急則上下之氣通地澤之情浹於以上召天和而
紹唐虞三代之治也何有

周易

象曰澤上有地臨君子以教思无窮容保民无疆

編修臣張若需

蔡清曰勞之來之匡之直之輔之翼之使自得之
又從而振德之可見君子教思之无窮民吾同胞
必使皆樂其樂而利其利可見君子之容保民无
疆也

臣謹按治天下之道不外教與養兩端唐虞尚矣

命契為司徒則曰敬敷五教命棄為后稷則曰播時百穀所以正德利用厚生者功叙惟歌俾之勿壞三代以來教民之道益詳保民之政益備而良法美意尤莫具於周禮一書間嘗考之地官司徒掌邦教典曰教典職曰教職象曰教象法曰教法官曰教官教官之屬似專為教設乃觀大司徒之職主土地封疆之政以土會辨物生以土宜辨名物以土均之法制地征而後施之以十有二教興

之以鄉三物防僞而以五禮教之中防情而以六
樂教之和其屬則鄉師至比長有考德行察道藝
月吉讀法之文遂人至鄰長有授田野教稼穡三
歲興甿之制而且師氏保氏迪於上司諫司救訓
於下廩人以數邦用司稼以均民食下至土化之
法瀦澮之宜莫不掌之專官施其禁令然後知聖
人之於民也必先有以盡地利而後可以淑人心
既有以淑人心而後可以復民性成周教養之法

分見於六官而司徒獨備其全雖其條目布置先後不一以見教不徒行養有兼濟而使民相生相愛之其實參錯而並施也方策所載纖悉畢備莫非聖人精神智慮之所寄而運量之廣固恢恢乎納萬物於在宥矣是故治術多端本於建極教之无窮者繫乎思也保民无疆者實能容也使出身加民之際無至誠愷惻之意與之相永則徒法不能以自行將有久而必敝之勢而一切苟且遷就

之治僅能補救於一隅不克普美利於遐邇皆君子所不道也然則至治之世德教洽於人心經綸彌於海宇優游漸漬入之最深旁皇周浹覃於無外象涵濡於兌澤安持載於坤輿戴履之倫有幾忘帝力於何有者不將軼官禮之隆規而臻勲華之上理也乎

周易

象曰澤上有地臨君子以教思无窮容保民无疆

監察御史

臣

金溶

本義曰二者皆臨下之事教之无窮者兌也容之无疆者坤也

臣謹按人主之君臨天下統御寰區非徒擁崇高之位擅威福之柄也其精神智慮常關注於匹夫匹婦之隱而協其性情謀其家室其念之誠也有

加無已其量之宏也無遠弗周故讀易至兌下坤
上之卦而歎聖帝明王之所以為民計者至深且
遠也蓋天下之至愚者民也天不忍其終於愚昧
於是生先覺之聖人以作之師而教立焉天下之
至渙者民也天不忍其少有顛連於是有繼天之
元后以作之君而養興焉而易卦之臨具此義矣
且澤取乎潤物有漬漸不已之意故教而深之以
思地取乎載物有含蓄無盡之意故保而深之以

容固不徒沾沾於教養之虛名而洵有與澤俱深
與地俱永之實際也但從來上之所施於民民之
厚期於上舉不外此教養二事而二事之中又有
先後之分緩急之異不可不察也書曰資富能訓
孟子曰聖人治天下使有菽粟如水火菽粟如水
火而民焉有不仁者乎是謀生之不及則雖有黨
庠術序能馴其耳目究不能洽其心思何也志有
分也民生有蕃衍之勢固不能無所資而立天地

有自然之利亦不能無所待而開一夫不耕或受
之飢一女不織或受之寒而復有山川之限隔時
世之變遷地勢之廣狹風俗之厚薄氣運之盛衰
極紛紜不齊之致欲使天下之疲癯殘疾惛獨鰥
寡無一不在包含徧覆之中而獲長養生全之慶
此亦事之最難區畫經營者也而聖人於此若有
不敢畏其難者汲汲皇皇肫肫懇懇有其法不徒
恃其法而法外復有運用有其澤不徒恃其澤而

澤外更有恩勤竭其心思神其經緯務使地無遺
利人無遺力不計目前不規小利被潤澤而大豐
美所謂體仁長人樂天者保天下者此也由是比
戶封而親遜自裕俯仰足而揖讓皆興物畜然後
有禮將有相因而漸至者矣是故論教於養之先
者王道之成論養於教之先者王道之始養之為
勢難而急教之為數易而緩觀臨之象而致治之
能事畢矣

周易

君子以教思无窮容保民无疆

侍讀_臣周玉章

_臣謹按天生民而立之君戴之為元后親之為父母必將合天下之身心而陶淑之萃億兆之室家而康乂之乃克稱臨民之任蓋臨者非第以貴馭賤以卑承尊之謂謂其有以教之也謂其有以保之也唐虞之世九功惟叙九叙惟歌敷教在寬安

民則惠其所以嘉惠元元者深矣三代以來法制
大備脩六禮以節民性明七教以興民德齊八政
以防淫一道德以同俗養耆老以致孝卹孤獨以
逮不足自司徒司空而下以至樂正黨正比長族
師皆司教民之官也載師閭師遂人均人皆分保
民之職也以故風俗醇茂獄訟衰息衣食饒足蓄
害不生熙熙然太平之盛治與然教不恃乎術之
多而貴有此誨人不倦之心保固期乎澤之渥而

尤重此怙冒無外之量讀臨卦之象辭而可見矣
胡氏炳文曰不徒曰教而曰教思其意思如兌澤
之深不徒曰保民而曰容保民其度量如坤土之
大蓋崇四術立四教黨庠術序有其地詩書禮樂
有其文興賢舉能示之勸觴撻郊遂示之懲教民
之道盡矣而君子懃懃懇懇之心無時或已惟願
家皆孝弟戶盡醇良與吾民日漸月摩淪肌浹髓
教思無窮程子所謂至誠無斁也任九職定九賦

農桑畜牧殖其本山林川澤取其材比閭族黨奠
其居兵甲車乘捍其患保民之制詳矣而君子民
胞物與之量擴之彌宏真覺天下一家中國一人
必使一夫無不獲之辜海隅無未徧之澤容保无
疆程子所謂廣大無限也夫教人以善謂之忠若
臨天下者之曲成萬物將昆蟲草木且被其光華
而屬在含生負性者可知一命之士留心利物必
有所濟若臨天下者之覆冒蒼生雖奕禩萬年猶

享其樂利而當時之飲和食德者更將何如甚矣
其无窮也甚矣其无疆也兌之象曰君子以朋友
講習坤之象曰君子以厚德載物至兌與坤合而
以上臨下之象呈焉君子觀其象法兌澤之義孚
化於羣黎體坤厚之德錫福於兆庶堯舜禹湯文
武之臨民率由此道也

周易

君子以教思无窮容保民无疆

編修臣孫人龍

朱子曰二者皆臨下之事教之无窮者允也容之无疆者坤也

蔡清曰勞之來之匡之直之輔之翼之使自得之又從而振德之此可見君子之教思无窮民吾同胞以至鰥寡孤獨皆吾兄弟之顛連而無告必使

皆樂其樂而利其利此可見君子之容保民无疆也

臣謹按先儒謂澤上有地其象為臨臨下之道不外教與養兩端而澤以淪浹至深為義故有教導人之意不徒曰教而曰教思者其意念必如兌澤之深而真誠罔斃焉地以漸被甚廣為義故有容受人之意不徒曰容民而曰容保民者其度量必如坤地之大而博厚無遺焉此君子之善體乎臨

卦之義者也蓋嘗念之百姓者朝廷之赤子也故
唐劉蕡謂宜令慈仁者親之育之如保傅焉如乳
哺焉如師之訓導焉而後民之於上也敬之如神
明愛之如父母宋歐陽修亦云唐虞三代之為法
其慮民之意甚精治民之具甚備防民之術甚周
誘民之道甚篤行之以勤而被於物者洽浸之以
漸而入於人者深故民之生也不用力於南畝則
從事於禮樂之際不在其家則在乎庠序耳間目

見無非仁義道德而趨之不知其倦是則臨天下者立教興養固惟至誠無息以貫徹於一日萬幾之中而若地方有民社之責者尤必仰承德意輔化宣猷凡制田里薄賦歛設學校立師儒匪第曰奉行故事而已也務在本實心為實政而開衣食之源興禮讓之化漸漬涵濡所以復民性者初終靡倦廣博深厚所以遂民生者遐邇咸周夫然後風俗美而教化行乃克奏太平盛治於億萬年矣

周易

君子以教思无窮容保民无疆

監察御史臣李清芳

朱子註曰地臨於澤上臨下也二者皆臨下之事
教之无窮者兌也容之无疆者坤也

臣謹按此章地澤之象而聖人繫之以辭則以人
君之所以教養斯民者為言可以見人君代天理
物必其有以使覆載之中無一物不得其所以遂

其生以復其性而躋一世於蕩平正直之休然後
可以參三才而立極也何也澤之深而無間浸灌
滋潤其被於物也無不發榮焉地之廣而無外溥
博深厚其及於物也無不咸亨焉君子體於澤而
為教思則漸民以仁摩民以義節民以禮使皆有
以全其性分之所固有職分之所當為而聖人之
心乃安焉體於地而為容保則養之以保息安之
以本俗聚之以荒政使其器用之利而財求之阜

百室之盈而婦子之寧而聖人之心乃快焉然論其序則養先於教既富方穀衣食足而後知禮義論其極則教深於養民可使由不可使知自新必推以新民故敷錫庶民之義必以會極歸極為至焉而容保之實事則惟曰制其田里教之樹畜周官頒十有二職於萬民使各盡其力之所極無曠土無游民食節事時民咸安其居教思之實事則惟曰設大學以教國立庠序以化邑五禮教之中

六樂教之和六德六行六藝三物以賓興之而已
矣夫自謀衣食豈其一一仰給於上惟民生厚豈
在上者之相為賜然而其職皆在於君者蓋以天
生民而立之君聰明睿智足以有臨則光天之下
至於海隅蒼生莫不托命此聖人所以引為己責
而惓惓不已之意如澤之深渾渾無涯之化如地
之大也裁成輔相參贊化育於以君臨萬邦豈不
盛哉

周易

六五知臨大君之宜吉象曰大君之宜行中之謂也

檢討臣呂熾

程子曰五以柔中順體居尊位而下應於二剛中之臣是能倚任於二不勞而治以知臨下者也夫以一人之身臨乎天下之廣若區區自任豈能周於萬事故自任其知者適足為不知唯能取天下之善任天下之聰明則無所不周是不自任其知

則其知大矣五順應於九二剛中之賢任之以臨
下乃已以明知臨天下大君之所宜也其吉可知
又曰君臣道合以氣類相求五有中德故能倚任
剛中之賢得大君之宜成知臨之功蓋由行其中
德也

朱子曰以柔居中下應九二不自用而任人乃知
之事而大君之宜吉之道也

臣謹按卦之爻辭及小象俱未明言任人之義而

注易者推求其義則五與二為正應為能虛中以聽故皆以不自用而任人言之正與中庸舜其大知也與一章意義相合蓋人君之臨天下所蒞者大一人之耳目不敵衆人之聞見唯廣詢博採翕受敷施則合天下之聰明皆一己之聰明其為知也大矣此卽舜之好問好察邇言隱惡而揚善也傳又歸之於行中臣以為此有二義一者君能行中則宅心處事無偏倚之私故能任賢勿貳以成

其知一者人君聽受天下之言其中過與不及亦甚參差不齊唯斟酌其至當不易者見諸施行則稽於衆者斷於獨其權衡仍在君而不在臣夫然後理無不得而庶績咸熙此卽舜之執其兩端用其中於民也程子於後一說似尚未及要而論之臨天下者莫貴於知故周書曰亶聰明作元后元后作民父母商書則曰視遠惟明聽德惟聰虞書則曰明四目達四聰此皆與知臨之說相發明者

也而知莫貴於行中虞書言惟精惟一允執厥中
商書言建中于民周書言率自中無作聰明亂舊
章此皆與行中之說相發明者也蓋臨上卦為坤
故取藏知之義五爻居中故取行中之義循是而
勿替焉卽為上六之敦臨謂其敦厚於臨故吉而
无咎豈非存此大知用中之德加以至誠不息之
功故能躋天下於郅隆之治者哉

周易

六五知臨大君之宜吉象曰大君之宜行中之謂也

監察御史臣周祖榮

程子曰五有中德能倚任剛中之賢得大君之宜成知臨之功蓋由行其中德也

臣謹按人臣之知居於一偏以明不明為量故負一長者皆可見功於國人君之知期於得中以宜不宜為量故不徧物者自足取用於人古之稱大

知者莫如舜而惟不自用而取諸人遂成執兩用中之治臨卦之六五其猶是乎柔中居尊有六四以為之相能守正而親賢有九二以為之應能竭誠以事上於是合天下之知以成一人之知而卽以一人之知運用乎天下之知豈非聰明睿智足以有臨者乎顧所謂宜者何也人君立一政而不能行於天下不可謂宜人君行一政而不能允協於中亦不可謂宜象以行中為大君之宜謂能行

中則必虛己任人集衆善以成一是故曰宜也夫
君道莫先於養民而勸農課桑待人而治莫重於
教民而議禮正樂得人而興惟知臨之主明於簡
賢方其政之未行也有咨詢之誠有論辨之典操
之於衡鑒者見擇中之精焉及其政之將行也有
股肱之寄有心膂之託措之於委任者見執中之
一焉以此臨天下所謂教思无窮容保民无疆者
不勞而自致此誠神靈首出左右咸宜者與要之

中而曰行言其用也如論其體其必係於君心乎
基命宥密能觀乎萬化之源清明在躬克建乎維
皇之極大君為天下得人而天工以亮庶績以熙
凡厥庶民無弗協於中者非在我之權度精切不
差何以與此也故曰為政在人取人以身也

周易

六五知臨大君之宜吉

給事中臣宮煥文

朱子曰以柔居中下應九二不自用而任人乃知之事而大君之宜吉之道也

程子曰五以柔中順體居尊位而下應於二剛中之臣是能倚任於二不勞而治以知臨下大君之所宜也其吉可知

臣謹按臨之取義以爻之陰陽言則為剛臨柔以象之地澤言則為上臨下皆以已臨人之義也君道也卦之六五居大君之位主坤之順致兌之說是宜為君而無不吉矣顧必下應九二剛中之臣乃始稱知臨而為大君之所宜而吉者何哉蓋人主以一身居乎巍巍之上以一心運乎茫茫之中其於天下之事與人固皆有相臨之分惟是道濟天下必先知周萬物而知周萬物者如徒恃一已

之知以周之未必果周之而不遺也中庸言至聖
聰明睿智足以有臨者非謂役吾耳目運吾心思
以求盡天下之無窮也亦惟不自用其聰而能用
天下之耳以為聰則其聰無不聞不自用其明而
能用天下之目以為明則其明無不見不自用其
睿智而能用天下之心思以為睿智則其睿無不
通而其智無不知書稱知人則哲能官人又曰股
肱惟人良臣惟聖詩言藹藹王多吉士維君子使

又曰佛時仔肩示我顯德行凡皆不自用而任人之道也知之事也是以自古聖帝哲王莫不勞於求賢而逸於任人三代以前若堯之得舜舜之得禹皋陶成湯武丁之得伊傅文武之得周召望散固皆用賢勿貳而致堂廉一德之休三代以後如漢之得蕭曹丙魏昭烈之得諸葛唐世之得房杜姚宋宋世之得文范富韓歐陽司馬諸賢亦皆知人善任而收宮府一體之效此其為大君之宜臨

下之吉尤其彰明較著者也嘗考程子之說曰君
貴明不貴察臣貴正不貴權今按臨之剛中如九
二是臣道之正者也柔中如六五是君道之明者
也五惟以君之明任臣之正故能上下交孚而德
合於中象曰大君之宜行中之謂謂其能以知行
中也夫惟中之所在而知及之因倚任之則君臣
道合矣君臣道合以之臨百官而百官以治以之
臨萬民而萬民以察由是教思无窮天下鼓舞其

化而莫測其用容保无疆天下涵濡其德而莫名
其功豈非亶聰之隆規元后之偉績與抑參諸他
卦自臨而進則為泰泰之六五其占曰以祉元吉
蓋亦取下應九二任賢而成交泰之功是知取人
為大自用則小明良喜起千古為昭要惟在我之
權度精切不差夫然後收公聽並觀之益無偏信
專任之私此又存乎任人之先者矣

周易

六五知臨大君之宜吉

監察御史臣張孝程

程傳曰五以柔中順體居尊位而下應於二剛中之臣是能倚任於二不勞而治以知臨下者也夫以一人之身臨乎天下之廣若區區自任豈能周於萬事故自任其知者適足為不知惟能取天下之善任天下之聰明則無所不周是不自任其知

則其知大矣五順應於九二剛中之賢任之以臨

下乃已以明知臨天下大君之所宜也其吉可知

臣謹按仲虺告湯曰好問則裕自用則小夫子稱
舜為大知以其不自用而取諸人也蓋天下之理
資於人則不勞而取諸已則有限誠以一人之耳
目心思斷不能周乎萬事萬物之廣故雖明如離
婁必有所不能見聰如師曠必有所不能聞心思
如堯舜必有所不能及苟自恃以為無所不見無

所不聞無所不及則舉其一而廢其百察於邇而遺於遠萬事萬物之廣所失有不可勝言者矣大抵人君之道有二或端拱無為以希穆清之化而所任非人則政必叢脞而不舉或勵精自治以任天下之重而不復任人則勢必勞苦而無功然而慕無為者中材之主而不輕任人者每多出於英明賢哲之后蓋其聰明神武本乎天縱其於天下之賢才每多否而少可而又其措置之力恢恢有

餘是以不難毅然以自任而不甚責成於其臣子
然大君終日焦勞於上而其下至於熟視而不敢
有所為甚者積習既久恬嬉成風乃至庸懦而不
能有所為則人主又何利於此是故君者職要者
也臣者職詳者也職要則莫要於任人昔文王罔
攸兼於庶言庶獄庶慎而務克知三有宅心灼見
三有俊心誠以天職修而上有所承體統立而下
有所寄非任人不可也若秦始皇之衡石程書隋

文帝之衛士傳餐處萬乘之尊躬庶司之務勞而
日拙何足尚乎夫惟合天下之聰明以為聰明則
視聽博而靡遺合天下之心思以為心思則計慮
周而鮮忒大權獨攬於上羣材奔走於下求賢勞
者其任人逸以仁育者必以知臨舜有五人武有
十亂唐虞三代之隆未有不本乎此者也

周易

六五知臨大君之宜吉

監察御史臣陳高翔

程子曰五以柔中順體居尊位而下應于九二剛中之臣是能倚任於二不勞而治以知臨下大君之所宜也其吉可知

朱子曰以柔居中下應九二不自用而任人乃知之事而大君之宜吉之道也

臣謹按居上臨下謂之臨而六五以中德居尊位
所謂聰明睿知足以有臨者也故有取于知臨之
象夫以天下之大萬民之衆必欲事事而理之物
而察之其勢有所不能故所謂知者不在于徧
物而在于親賢親賢斯能徧物矣唐虞之世府修
事和揆其所以致此者曰闢四門明四目達四聰
夫明四目達四聰則天下之聰明睿知皆一己之
聰明睿知斯其足以有臨也雖然自古人君孰不

欲任人而任得其人者往往而少蓋人不易知
人原不易或行與言違或心與迹異初終殊轍常
變改觀趨走承順有似於恭逡巡畏縮有似於謹
依違兩可有似於和阿諛逢迎有似於忠諸如此
類難以悉數此知人則哲堯舜其難也細觀此爻
柔順虛中具有知人之德而其所應者乃剛中之
九二表裏如一守正不渝以責難為恭以匪懈為
謹以不同為和以无私為忠五知而善任之正如

堯之知舜舜之知禹臯陶也其吉宜矣故人君欲
任人必先知人而知人又非逆億而伺察之謂也
清心寡欲則此中虛明洞達如鑒之照物妍媸畢
現先儒所謂居敬者尤知人任使之本與

周易

大君之宜行中之謂也

監察御史臣沈世楓

程傳曰君臣道合蓋以氣類相求五有中德故能倚任剛中之賢得大君之宜成知臨之功蓋由行其中德也人君之於賢才非道同德合豈能用也臣謹按周公爻辭以知臨為大君之宜而孔子象傳則以為行中之謂者非知之外別有一中乃欲

以中而成其知也夫以舜之大知猶問察隱揚以
歸於用中是可知非中不足以言知也蓋人之知
者或任其聰明而軼夫軌範或務為精密而轉至
遲疑則因知而失中豈惟任人鮮當哉凡發政施
令亦恐無以善其天亶之用矣夫中無定體隨時
而在惟視乎君心之操舍凡衆著於殿廷之間者
共見而共聞而慎持於宥密之內者獨知而獨覺
必於深宮默處之地節嗜慾謹情好無膠於成見

無惑乎旁撓鑑空衡平以審夫至善之所在然後
任人而權衡悉當制事而偏倚悉泯其所行乃無
乎不宜也卽如臨民之務不外教思容保二大端
乃教而必深之以思者不徒守條教之陳規也保
而必恢之以容者非以博施濟之鴻名也其間因
地制宜隨時變法斟酌盡善咸協於中而後知臨
之用一時蒙其利萬世享其福矣夫知為貞固中
貴允執中固貫徹於知之內而有以相濟然非誠

無以守之堅而要諸久此文王著臨卦之義必以利貞為訓而立誠以致中本中以行知信乎為大君之宜而天下咸仰亶聰之后已

周易

觀盥而不薦有孚顒若彖曰大觀在上順而巽中正以觀天下觀盥而不薦有孚顒若下觀而化也觀天之神道而四時不忒聖人以神道設教而天下服矣

少詹事臣福十寶

朱子曰觀者有以中正示人而為人所仰也盥將祭而潔手也薦奉酒食以祭也顒然尊敬之貌言致其潔清而不輕自用則其孚信在中而顒然可

仰也四時不忒天之所以為觀也神道設教聖人之所以為觀也

臣謹按人主一身天下之觀瞻係焉云為動靜不可以不慎也苟君極不立則君道不尊而天下失所仰矣豈大觀之謂乎故必有順巽之德內焉於理無所乖外焉於事無所拂自一身以達庶政無事制度文為之末一皆大中至正之規夫而後端拱九五之上一人垂裳而萬邦作式有不期然而

然者矣然此豈徒崇尚淡薄無為之治也哉觀之

卦辭取義於祭繫之曰盥而不薦有孚顒若是以
存誠主敬為大觀之本矣人君果能事事如盥而
未薦之時誠意渾全敬心純潔以精一凝固之神
立臣庶兆民之上此時雖有設施不見經營措置
之勞雖有變通不見紛更粉飾之迹將所存者既
神所過者自化天下之人潛移默運順帝之則於
不知此其感應之捷夫寧有端倪之可尋乎傳曰

視之而弗見聽之而弗聞體物而不可遺言天之
神道也詩曰不顯惟德百辟其刑之言聖人之設
教也大觀物化卽謂聖人以神道設教也亦宜昔
虞舜恭己正南面而天下自治文王不大聲以色
而萬邦作孚胥此物此志也夫

周易

有孚顒若

監察御史臣倪國璉

朱子曰顒然尊敬之貌言致其潔清而不輕自用則其孚信在中而顒然可仰也

臣謹按此承上文言為觀之道如祭者盥而未薦之時精誠專一凝而不散孚信之念存於中顒然之容見於外蓋總不外一主敬之學也夫觀德雖

在於民而為觀則在於己若居大觀之位而欲立
為觀之本非徒致謹乎號令文章已也必也惟精
惟一守之以中而不敢有一毫怠荒之意无思无
為持之以正而不敢有一毫輕率之事就如承祭
者盥而未薦其心純是一團誠敬聚齋戒之精神
於一日而致愛致慤積於馨香未達之先通萬心
之仁孝於一心而僂見愾聞凝於裸獻未將之始
此時精意潛孚誠心默契對越感通之微莫過於

此所謂有孚也由是理積而氣流孚遂并著之於
象第覺威儀容止之間無不示人以可尊可敬上
足以格如在之神而充滿昭著無不歆享下足以
懾駿奔之衆而精微惻愴罔不祇承其顯然可仰
者正惟此未渙未散之誠有以凝於內而徵於外
也夫存此意於廟中則不顯篤恭為昭假神明之
本形此意於民物則臨朝淵穆即蟠固天下之原
程子所謂上一於恭敬則天地自位萬物自育

氣無不和而四靈畢至矣大哉觀乎實德在中則有感必應此下觀而化所以莫不動其敬順之心以共仰其建中表正之盛治與

周易

大觀在上順而巽中正以觀天下觀盥而不薦有孚
顒若下觀而化也觀天之神道而四時不忒聖人以
神道設教而天下服矣

編修臣觀保

程子曰五居尊位以陽剛中正之德為下所觀其
德甚大故曰大觀在上下坤而上巽是能順而巽
也五居中正以巽順中正之德為觀於天下也為

觀之道嚴敬如始盥之時則下民至誠瞻仰而從化也天道至神故曰神道觀天之運行四時無有差忒則見其神妙聖人見天道之神體神道以設教故天下莫不服也

臣謹按人君繼天立極知臨九五之尊首出庶物之上順以宅心如堯舜之溫恭克讓文王之徽柔懿恭尤本乎巽以制事蓋巽者德之制也以類天下之情以通萬物之理所以因時而制宜也顧順

巽皆自其一身言之天德也自一身以達諸庶政
百度興而後志應紀綱飭而號令明本大中至正
之道以為協中歸正之基所以為觀於人者也王
道也至盥而不薦有孚顒若則以專一之精神發
而為顒叩之容止即建其有極之意也不動而敬
不言而信下觀而化者即歸其有極之意也若夫
妙不可測之謂聖聖不可知之謂神則上天之載
無聲無臭而日月運行一寒一暑四時代謝於其

中亘古亘今無稍差忒其寂然不動感而遂通往
來不窮變化不居天何言而四時行也此天之神
道也聖人者居天位備天德心與天合道與天契
凡敷幾感物無非體天之妙用故曰聖人以神道
設教豈若後世謬為讖緯機祥之說託為荒遠無
稽之談且假河圖洛書以實其說曰此聖人之神
道設教也哉是以聖人端拱於穆清之上蕩蕩乎
化而裁之推而行之神而明之默而成之者莫可

形容斯天下之人涵泳其德而不知其功鼓舞其
化而莫測其用忘帝力於何有日遷善而不知所
謂誠於此動於彼存者神過者化也然則聖人之
神道非神奇也即民彝物則日用尋常大中至正
之道也是以大觀在上而天下服也

周易

有孚顒若下觀而化也

監察御史臣馬丙

宋徐氏幾曰下觀而化以四陰觀二陽言謂上有精潔誠敬之德顒然可仰則天下有所觀感而化如舜恭己正南面而天下自治文王不大聲以色而萬邦作孚自然之感固如此也

臣謹按君民之際通乎性情感應之機捷於影響

上有顯示之模斯下有潛移之效自古迄今未之
有易也蓋君天下者首庶物而作覲垂衣裳而御
宇志氣神明咸與百姓之心思相貫衣冠瞻視常
與萬民之耳目相周風化之原實由於此是故誠
敬積於一心而德輝暢於四體勿虞勿詐內之不
參以偽妄之端如圭如璋外之自形其穆皇之象
淵默之衷彰於王度顒卬之望著於明堂思慮固
所不存而緣飾亦所不事矜持固所不作而鎮靜

亦所不知由是自朝廷以至百官自百官以至萬
民聚而覩焉旣共凜乎天顏環而象之因以成為
風俗不待申命懸書而瞻聖主之清光自潛消其
積習之染無煩令行禁止而對明王之德宇自隱
動其樂善之思其觀而化也非上之有孚顒若者
足以感之曷克臻此乎故徐氏舉舜與文王以發
明之者蓋帝舜以溫恭允塞之精心垂旒撝珽施
於山龍藻火之華而時雍風動之休因之以作海

隅蒼生罔不欽承帝德此其徵也文王以徽柔懿
恭之至意端拱深居發為臨保肅雖之盛而喬木
甘棠之化因之而成小懷大畏罔不樂順王風此
亦其徵也是知深宮之作則非欲要結於斯人而
默召之神勢難遏焉雖在愚民能不聞風而向道
閭里之會歸非欲求媚於天子而觀感之深心難
已焉編氓雖陋能不革面而回心故上之所示下
斯應之其事有必至其機有必然也帝王表正萬

邦之道其理豈外是哉

周易

六四觀國之光利用賓于王

監察御史臣倪國璉

程子曰聖明在上則懷抱才德之人皆願進於朝廷輔戴之以匡濟天下四既觀見人君之德國家之治光華盛美所宜賓于王朝效其智力上輔於君以施澤天下故云利用賓于王也

臣謹按此言觀道之極盛也五以中正之德大觀

在上而最近者莫如六四一爻所以觀之最切蓋
斯時在上之本身以出政者謨烈顯承炳為邦治
文章禮樂蔚為國華其盛德之光輝不特見之一
身而且著之於天下惟四得以仰瞻日月躬覩休
明有如唐虞之時叙為典禮敷為文德播為干羽
國光之發越甚隆而禹稷臯夔諸佐皆得就日而
瞻雲又如成周之時顯為懿德傳為令聞著為雅
頌國光之宣昭甚遠而周召畢散諸臣皆得覲光

而揚烈夫明良相遇之日自古為難而聲明文物
之朝代不數觀占斯爻者所以奮然而興幸際盛
明願依末光以景郅治也然此有才有德之士原
由朝廷數十百年之培植而成盈廷師濟所以誌
美於書棧樸菁莪所以興歌於雅國家於朝覲之
臣則賓而禮之於草茅之士則賓而興之是以旗
章袞烏錫之以禮者敷湛露之深恩而修其方物
以其介圭用以對越天威焉則燕笑譽處之餘煌

煌乎觀愷樂之龍光也且承筐鼓瑟讌之以樂者
舉鹿鳴之盛典而進於司徒升於司馬用以委贄
彤庭焉則書思對命之際奕奕乎觀令德之休光
也用賓於王者其利如是上下交而其志同策力
獻而其政舉大觀之主在上豈獨六四一爻之幸
乎詩曰鳳凰鳴矣于彼高岡梧桐生矣于彼朝陽
萑萑萑萑離離喈喈惟有萑萑之嘉蔭而因以致
離離之和鳴則四之觀光而得與於賓禮也究由

五之中正足以為觀於上而令下觀而化耳

周易

觀乎人文以化成天下

編修臣 竇光鼐

臣謹按賁之彖辭曰文明以止人文也朱子本義曰以卦德言之止謂各得其分呂溫曰文者言錯綜庶績藻繪人情如成文焉以致其理然則易所謂文猶曰萬物各得其理云爾何以明其然也人之生也離居不相待則窮羣而無分則爭二者天

下之大患也是故君臣父子之間兄弟夫婦之際
文之所由起也君君臣臣父父子子兄弟弟夫
夫婦婦文之所由成也若然則文在天下亦人自
為正之具耳而曰觀乎人文以化成天下何也道
率於性而修於教也荀卿曰聖也者盡倫者也王
也者盡制者也古之聖王觀乎人之有君臣而明
其朝覲燕饗以止於義也觀乎人之有父子而明
其寢膳問省以止於親也觀乎人之有兄弟而明

其奉几執醬以止於序也觀乎人之有夫婦而明
其親迎合蚤以止於別也以為是足以厭天下之
心而觀吾化之成矣既而猶慮其未足以厭天下
之心而觀吾化之成也則又為之彫琢刻鏤黼黻
文章以飾其目為之疏房櫨貌越席牀第以飾其
體為之鐘鼓管磬羽籥干戚以飾其樂為之寢兕
持虎蛟黼彌龍以飾其威為之籩豆樽俎毛魚鼈
羹以飾其愛敬之情為之賓主介紹筐篚玉帛以

飾其交會之節使天下之人得其養而好其別安其身而深思其意至於步驟馳騁方皇周浹鼓舞之而不倦日用之而不知也故曰欲觀聖王之跡則於其粲然者矣蘓轍曰歷觀唐虞至於商周末嘗一日而不趨於文也由今考之明俊德親九族平章百姓協和萬邦陶唐氏之文也徽五典叙百揆賓四門命九官有虞氏之文也六府孔修庶土交正祇台德先不距朕行夏后氏之文也率民事

神先罰後賞商之文也尊禮尚施賞罰用爵列周
之文也孔子曰周監於二代郁郁乎文哉蓋亦以
為王道之盛其文理當極於是焉耳至於後世文
久而息節奏久而絕而議者乃以為用文之弊夫
使古聖王而不用文也則萬物之不得其理久矣
且以賁卦論之六五為賁之主以敦本而終吉上
九居賁之極以返本而无咎此乃所謂文明以止
之人文也後人不思飾質以為文而滅質以為文

至或盛威儀以求至理驚繁縟而待太平及其用
之不效而乃歸過於文不亦惑乎易曰物不可以
苟合故受之以賁致飾然後亨則盡矣故受之以
剝真善言文者哉

周易

觀乎人文以化成天下

編修臣錢琦

臣謹按一代之文章一代之氣運為之亦一代之
學問主之也虞夏之書渾渾商書灝灝周書噩噩
唯時際其盛亦德極其隆故文遂炳炳麟麟自詞
采日熾道義始蝕華藻勝而理義之旨微蕪陋滋
而爾雅之辭鮮此匪獨文章之病抑亦世道人心

之懼也易之賁曰觀乎人文以化成天下蓋言風
氣之所成皆教化之所致然則所以障學海之狂
瀾作世教之砥柱者不可不講矣臣摠其略大約
人文之弊易犯者六而所以化成之者其要亦有
六一則艷詞逞辨窮極瑰麗撫拾以快聰明典而
不確尋討以矜淵博麗而不經是為夸一則挾隱
宗玄過為詭誕競今擯古旁引不經如李長吉之
嘔心揚子雲之集字是為怪一則鑽研蠹穴墨守

兔園蕪穢而不切於情拘牽而不達於事土羹塵
飯糟粕唾餘是為腐一則纖佻乏骨塗澤無神但
求屬對之工不嫌傅會彌竭琢鏤之巧終失大方
是為鑿一則瘠義肥辭繁雜失統連篇累幅神氣
不聯未免支離或致重複是為冗一則心孤情懼
貌瘁神傷辭不克以達心興殊落落才不足以稱
體幅亦寥寥是為枯夫言以旌心文原載道經史
之旨薈萃百家孔孟之書包涵萬象不必別求奇

也是故貴正本也夫本固則葉盛源遠則流長古
之作者胸羅星斗筭富縹緗以故濡毫則珠璣並
集著紙則風雨爭飛非枵腹所能辦也是故貴儲
學也夫井蛙不可語海拘於墟也夏蟲不可語冰
篤於時也學者少所見則多所怪矣上下千年縱
橫萬里而後著書匪自成一家之言立說非強作
解事之論也是故貴廣識也夫水蓄則盛火宿則
壯風積則厚氣養則充沛若江河之決屈曲皆流

響如宮羽之調短長悉協非一朝一夕之故也是故貴養氣也廼若議論之詞不可施於紀事草野之語不可上於明堂非明辨以哲是猶慕規之圓而規珪之方旣無當於體裁泥古之言而違時之制必有乖於事理是故貴辨體也至若食古宜化下筆有神奧義可以自抒心裁務期獨出不然僅工獺祭或見嗤於優孟之衣冠即解蟲鐫且有類於東施之顰笑是故貴神解也夫本正則俗說不

清學博則考証有據識廣則無固陋之失氣充則
無淺薄之虞文有體裁則靡巧之弊革學能神解
則模擬之習除由是離離蔚蔚喬喬皇皇人文日
盛氣運日隆直與唐虞三代比美矣夫非在上者
有以化成之奚以臻此此則聖人用賁之道與

周易

觀乎人文以化成天下

監察御史臣王顯緒

臣謹按賁之為卦離下艮上離本卦彖辭曰重明以麗乎正乃化成天下艮本卦彖辭曰動靜不失其時其道光明是離自離而艮自艮也至賁以離處於下火之性炎上而莫遏艮居於上山之體峙立而不遷約離於艮而光輝愈見凝聚飾艮於離

而行藏悉寓中庸離得至善其明不流於浮艮得至明所止不囿於陋甚矣賁道之大也其文之在人不可取而觀乎夫天下一人文之區也舉凡倫常之大綱紀之繁以及禮樂文章之細懸之象魏之際而無所易達之山海之遙而無所違聲溢八荒光被四表歷古聖帝明王所以張弛損益者治美當時功垂後世人文之盛亦各成其化矣而孰不由賁之文明以止者致之哉是故觀賁之明以

經綸天下而典禮敦庸皆煥然不容揜觀賁之止
以節文天下而等威度數皆確然不可越典禮敦
庸之所布天下漸被於熙熙皞皞之風等威度數
之所齊天下甄陶於蕩蕩平平之治則化成於恩
明誼美者賁之離明之德之所致化成於道一風
同者賁之艮止之德之所致也在王者乘時出治
且未有不法天者天文人文一而二二而一天文
之溫肅寒暑日風雷雨其各有節次者與人文之

各有條理無以異其各有氣候者與人文之各有
分量無以異王者之化動與天文相合卽極之日
月合璧五星聯珠卿雲見甘露降又未始不可以
人文化成為感召孔氏穎達曰文明離也以止艮
也胡氏允曰粲然有禮以相接者文之明也截然
有分以相守者文之止也何氏楷曰一文之一止
之而文成此三說小有異同其於離德明艮德止
合明與止以成人文之化者則皆發明精切程傳

曰人文人理之倫序觀人文以教化天下天下成其禮俗乃聖人用賁之道也是賁之為賁既為聖人推化之則復為聖人興化之驗賁之所成詎不大乎哉

周易

上九碩果不食君子得輿

監察御史臣沈懋華

王弼曰處卦之終獨全不落故果至於碩而不見食也

厚齋馮氏曰陽為大故稱碩果

臣謹按碩大也不食者不可得而食之也道大而莫能容材大而難為用斯不食之義與東漢中申

屠蟠絕迹芒碭之間因樹為屋自同傭人袁閼累徵不應土室潛身十有八年兩人可謂不食者已匪特此也郭林宗操人倫之鑒初以有道徵不起迨其沒也自華陰函谷關以西河內湯陰以北二千里負笈荷擔彌路柴車輦裝塞塗蓋有萬數來赴殆所稱君子得輿者耶若夫張儉之為黨魁也始列八及之首既以鄉人朱並希中常侍侯覽意告儉與同鄉二十四人別相署號共為部黨則儉

又列八俊之首及夫刊章捕牒亡命所至連染殆
數百家莫不重其名行破家相容此亦得輿之象
矣黨事解不應徵辟建安初年八十餘當塗之勢
已成起為衛尉不得已乃闔門懸車不豫世事當
是時也無論侯覽朱並諸人腐骨已朽卽元禮孟
博名在天壤而昔日之蕩為洪波鼓為烈燄者俱
已銷歸何有儉於茲時已非復黨人面目迴視向
之刻石立墀與小夫刑人爭一日之命者不足當

一映已蓋漢魏之交歸然一老天殆留此碩果以
終東漢節義之局其斯以為張儉耳矣蠱之上九
曰不事王侯高尚其事亦取象於艮止之義然武
王興周光武復漢上九一爻乃伯夷嚴光之所有
事也又非張儉諸人之所敢望也夫

周易

反復其道七日來復利有攸往

監察御史臣沈懋華

節齋蔡氏曰陽自建午之月漸消漸剝至建子之月而為復在卦經七爻於時經七月故曰七日來復

鄭氏剛中曰七者陽數日為陽故於陽長言日八者陰數月為陰臨剛長以陰為戒故言月

臣謹按先儒解此卦皆云五月一陰生至十一月一陽生凡七月不言月欲見陽長須速故變文言日程朱說易皆然獨鄭注則曰陽氣始剝盡至來復時凡七日王輔嗣宗之曰剝盡至來復經七日也若從五月言之何得云始盡乎鄭注本於易緯稽覽圖言卦氣起中孚離坎震兌各主一方其餘六十卦一爻主一日每卦得六日七分從剝卦陽氣之盡至復卦陽來中隔坤之一卦六日七分輔

嗣舉成數言故云凡經七日也康成以緯亂經其
說謬悠而不可為訓輔嗣宗之非矣夫七日者猶
言七變也云爾以卦數之則自姤而遯而否而觀
而剝而坤而復為七卦以爻數之則自姤之一陰
遯之二陰否之三陰觀之四陰剝之五陰坤之六
陰至復之一陽為七爻以月數之則自五月建午
六月建未七月建申八月建酉九月建戌十月建
亥至十一月建子為七月皆經七次變更陽氣始

復變月言日亦如豳詩所謂一之日二之日也云爾聖人於臨卦則曰至於八月陽消而數月者幸其消之遲也所以抑陰也於復卦則曰七日來復陽長而數日者喜其長之速也所以扶陽也然則七日來復當自姤數而不當自剝數也明矣康成之說何據乎抑又論之經多言日罕言月復言日而始不言月則始之為月可知詩云一之日日者月也不稱月者嫌於无陽也復則亟言日以主乎

月猶坤之上六稱龍也重陽而輕陰不稱月而稱
日其義如此

周易

七日來復天行也利有攸往剛長也復其見天地之心乎

編修臣朱佩蓮

臣謹按䷗卦內震外坤一陽始生於五陰之下與姤卦相反復姤卦一陰生遞生而上為遯為否為觀為剝為坤窮乎上而反乎下歷七爻而一陽旋復故為七日來復夫姤卦五月也復卦十一月也

相去七月諸儒遂有以七日為七月者抑思臨卦
言八月復卦言七日義各有當豈得援豳風一之
日二之日謂可變月言日耶孔穎達疏亦以七日
言但引易緯六日七分配一卦之說以為剝卦陽
氣盡於九月之末十月純坤用事隔坤卦六日七
分而復卦陽來則又未免牽合臣愚以為歷春夏
秋冬而成一歲歷晦朔弦望而成一月晦朔消息
也弦望虛盈也消息盈虛天行也自朔而上弦自

上弦而望自既望而下弦自下弦而晦大約積七日而一變故三月者一歲小變之節七日者一月小變之候人性本善遠而三月不違乎仁近而七日來復乎仁天人相應之節候也且易亦尚有言七日者矣婦喪其茀勿逐七日得固明言七日即蠱之先甲三日為辛後甲三日為丁自辛至丁凡七日巽之先庚三日為丁後庚三日為癸自丁至癸凡七日无初有終終則有始無在非七日來復

之義利有攸往者剛德方長自下而上為臨為泰
為大壯為夬為乾君子道長往无不利故利有攸
往也復以初爻為卦主不遠復即七日來復无祇
悔元吉即利有攸往不已互相發明哉咸恒大壯
皆言天地之情復獨言天地之心天地之心以靜
而息以動而生一動一靜互為其根先儒皆主靜
唯伊川主動其實聖人有見於剝反為復動含靜
中雖未生而已有生物之心所謂仁也動不離靜

故能生生不已人身一小天地也在一歲則子月
為復在一日則子時為復子月冬至之時閉闔安
靜君子所以齋戒掩身以待陰陽之所定也子時
平旦之氣好惡清明君子所以滋息培養常存仁
義之良心也湯王昧爽丕顯成王基命宥密皆得
此意我

皇上講易見天心默喻乎天命流行之始造化發育之
初生生不已自有與天心相印者非臣管窺所能

見及也

周易

復其見天地之心乎

編修臣 吳兆雯

朱子本義積陰之下一陽復生天地生物之心幾於滅息而至此乃復可見在人則為靜極而動惡極而善本心幾息而復見之端也

吳曰慎曰天地以生物為心所謂仁也復之一陽初動仁也

臣謹按天下有竝立之名而無相悖之理陰陽其大者也陽生物而陰佐之陽之理鬯而陰之理益以全非形於兩者之不悖惟貞於一者之最神也不二之謂一不變之謂貞運而莫測之謂神若徒見其春夏長育秋冬剝落遂謂陰陽相耦各為盛衰一氣之中自為隔絕則陽之復又於何為其橐籥耶儒者推明盈虛消長之義有謂不翕聚則不發散不肅殺則不長養究之聚散殺養非二心也

使有二心則天地萬物相悖相害心之不仁也滋甚抑何以昭然藹然共見於天地之間乎惟從至一者求之造化茫茫也樞紐存焉庶橐芒芒也根柢藏焉先天後天自為終始者祇此心耳元氣轉運略無停待生生不息充滿布濩陽之退卽陰之生非陽外有陰也陰之盛正陽之蓄非陰見而陽絕也設陽外別有所謂陰必且錮閉衰落如槁木然此心寄於何所耶蓋天地之於物獨陽不生獨

陰不成春而發育陽之施也天地之心之好也夏而長養變化陽之極也天地之心之憂也既蓄其好生之具又厯其匱乏之憂天地安得不剝又安得不復復者仁也剝亦仁也所以云見也但人所見者為陽之陽所不見者為陽之陰而天地之心原無斷續故陽自見陰亦自見也彼雷之能奮蟲之能蠕鳥之能鳴至冬至而雷蟄矣蟲瑾矣鳥伏矣如謂無雷無蟲無鳥也則後之辟言者啄蚊者

嚶鳴者伊何物耶得天地之氣者猶然况綿綿若
存為天地根者乎且天地之心猶人心也人心寂
然不動感而遂通寂然者陰象也奈何云通惟其
舉天地萬物實有之理斂而為寂故湛然不動中
觸之輒應未感非本無既感非始有動而能詘靜
而善因均是心也至此則愈可見耳見於其所可
見而天地之心在見於其所不可見而天地之心
亦在也第復則見之不復何從而見哉且夫復亦

難言矣陰之極也龍斯戰焉然未有不戰而能復者戰非勝人也自勝焉耳克已復禮自勝之道也天下歸仁心始見也於天地又何疑焉信乎貞於一者之最神非形於兩者之不悖惟復故一惟一故見舉凡摩盪絀絀於生生之際者惟聖人為能通乎盈虛消長之大原也

周易

復其見天地之心乎

編修臣儲麟趾

臣謹按乾之彖曰乾元統天坤之彖曰坤元承天元之為義於德為仁於時為春元大也始也一元大始而四時樞紐以為消息庶彙根柢以為生成是天地固無心以成化而亦若有心焉可約畧而見者此復之為卦所以有復見天地之心之說也

易上下經六十四卦盡於乾坤始復而四卦又以復為主復卦又以初爻為主始者坤之始也復者乾之始也聖人於陽氣根荄之初特重言之曰天地之心蓋以其主宰謂之帝以其不測謂之神以其性情謂之乾以其形氣謂之天天包乎地天以大生地以廣生此卽其生生之意云爾夫剝盡為坤而十月謂之陽月陽無可盡之理方剝於上已胚胎於下積之一月而一陽之體始成故稱復

焉坤變為震震非乾也而得乾之初爻一陽動於五陰之下以順上行嗣是為臨為泰天地交而上下通皆於是乎始聖人貴陽故於其始而曰此天地之心誠以陽者萬物之所從生而一者萬物之所從始也元統四德而常存春貫四時而常在證之邵子天根月窟閒來往三十六宮都是春之說不益信乎蓋所謂復者在子之半推之也邵子又曰冬至子之半天心無改移惟其無改移故灼然

可見爾六陽盡而一陰生為天風姤為夏至六陰盡而一陽生為地雷復為冬至姤復循環無端而元酒方淡太音正希之喻其尤可推驗者也卽如律管隔八相生以黃鍾生林鍾為律取妻以林鍾生太簇為呂生子推之他律旋相為宮生生不已此月律黃鍾所以獨為萬事之根本也故曰動靜無端陰陽無始一日如是千歲如是所謂天心無改移之說尤可信矣若夫復之與姤一也聖人於

陽則內之故謂之復復反也剛德方長而幸其有
日進之勢焉於陰則外之故謂之姤姤遇也本非
所望而猝然值之之謂也此又可見天地之心任
陽而不任陰乾元坤元揔一生生不息之意充周
於六十四卦之中而體乾之聖人遵扶陽抑陰之
義內君子而外小人養其幾希之萌防其消長之
漸其又烏容已乎哉

欽定四庫全書

卷五

周易

復其見天地之心乎

檢討臣萬松齡

臣謹按六十四卦彖傳多言天地之情而復獨言天地之心王輔嗣云復者反本之謂蓋子為十二支之首黃鐘為萬事根本大化無窮皆權輿於此其說固為至善而其謂天地以本為心雷息地中乃天地之心見且謂動息則靜靜非對動者也孔

疏因釋之曰天地之動靜為其本動為其末暫時而動止息則歸於靜是其說專重於靜而先儒多主之以靜為見天地之心然復之為卦內震外坤初九一爻為卦之主陽動於下而以順上行陰翳潛消陽和默轉天地生生之機正在於動且彖傳曰剛反曰剛長是復之為卦正以陽氣始生而得名也而乃以寂然至無為復不與卦體有未合乎夫天地無心以生物為心朱子本義云積陰之下

一陽復生天地生物之心幾息而至此乃復可見
此天命流行之初造化發育之始邵子所謂天心
無改移正在於此而程子謂動之端乃天地之心
非體道之深不足與乎此也蓋天以動為體地以
靜為體地統於天故靜不能該動天包乎地故動
常足以該靜而乾元坤元實統亨利貞三德故當
其靜也生理中涵太和保合此時生物之心未嘗
無而兆隱於不可見及其動也聲希味淡陽回子

半生物之心亦非至是而後有而幾動於有可窺
過此以往則資始者漸以流形資生者日以光大
則觀察化源者直以為見其情之顯露而不曰見
其心矣推而言之天地有復人心亦有復分而言
之衆人有復賢人有復聖人亦有復衆人之心復
於善賢人之心善不能無間而其復之也不遠焉
惟聖人之心純亦不已無事於續若不可以復名
然其一理渾然流行無滯至靜之中寓至動之象

則亦如天之行健固無時非復也故靜則退藏於
密寂然不動猶天地之陰與靜專靜翕者一矣動
則圓神莫測感而遂通猶天地之陽與動直動闢
者一矣而其由靜而之動則與貞元之交亥子之
界相似而卽可以見天地之心者見聖人之心抑
又觀伏羲大圓圖乾上坤下實居子午之中復次
於坤而在下蓋聖神功化之極未有不自下學立
心始者而造化分於一中經綸起於心上易學之

大所以為萬世聖人之心法也與

周易

剛健篤實輝光日新其德

編修臣錢琦

程子曰以卦之才德而言也乾體剛健艮體篤實
人之才剛健篤實則所畜能大充實而有輝光畜
之不已則其德日新也

臣謹按天下無無本之學亦無蹴至之功自古聖
賢所造或異要未有不自密其閤修而克漸底於

粹精之域者書之頌堯也曰欽明文思安安而必
曰克明俊德頌舜也曰重華協于帝而必曰濬哲
文明溫恭允塞禹則文命敷于四海矣而臯陶曰
慎厥身修思永湯則德日新矣而仲虺曰慎厥終
惟其始亦可知學問之功積而愈有所以致其力
者不可不精以專也大畜一卦內乾而外艮乾有
天德之剛自有天行之健艮有成始成終之敦厚
自有時止時行之光明象曰大畜剛健篤實輝光

日新其德其義可思矣今夫理欲之介非委靡所能決也知行之功非浮華所能盡也水畜則盛火宿則壯風積則厚故柔情異志亦足自安而存理遏欲斷必持之以果確而後德可日進於無疆雄才大略亦足致用而去浮絕囂斷必出之以安敦而後德可日臻於光大襲取者外強而中乾浮慕者貌合而神失均于德無補也然則畜德之君子何如周易首乾以其卦德之剛健也其象曰天行

健君子以自強不息則其所以畜之者亦體乾以存心而已矣夏有連山其卦首艮以其卦德之篤實輝光也其象曰敦艮之吉以厚終也則其所以畜之者亦體艮以制事而已矣體乾以存心則不屈於人欲不間於己私而我之所以自為者有主體艮以制事則不涉於浮游不淪於虛妄而我之所以履道者有方將英資之振厲旣奮發於先而素履之敦慤復體驗於後如彼為山積久而高矣

如彼掘井歷久而深矣如彼琢玉磨礱久而瑕疵
淨英華外發矣如彼樹木培植久而本根固枝葉
日茂矣向之所有踰時而見為陳迹今之所得觸
處而盡屬新機雖天道運行循環不息而進修無
止機者亦積累無止境所謂日新之謂盛德者此
耳雖古堯舜禹湯之所以立極於千古者又豈有
加於是也哉象之詞曰君子多識前言往行以畜
其德蓋其所以用才者誠不可不審矣

欽定四庫全書

卷五

周易

剛健篤實輝光日新其德

監察御史臣周祖榮

程子曰乾體剛健艮體篤實人之才剛健篤實則所畜能大充實而有輝光畜之不已則其德日新也

鄭汝諧曰此蘊畜之大者

臣謹按盡性之學首在明德德賦於天為吾性之

固有苟自修者薄則無以蘊之而德不明矣聖人
觀乾以大始艮以厚終終始相推而大畜之義著
焉蓋乾之德純乎天體而無所撓是其剛周乎天
行而無所息是其健聖人法剛健以存心則道心
伸而人心退聽此自疆之學所以植性之體也艮
之德二陰內止而氣不囂是其篤實一陽外見而
明不掩是其輝光聖人用篤實以修身涵輝光以
應事則泰宇定而天光自發此安止之學所以達

性之用也夫賦性之始其體未嘗不宏其用未嘗
不裕然無學以繼之則人事之私於以勝理物情
之偽於以清真未免心體漸狹措事失宜畜既不
大德何由新德既不新性何由復今自剛健以進
於篤實自篤實以進於輝光則精進之深歲時不
息積累之久新機自生如泉本清也有以濬之而
其源益潔鑑本明也有以拭之而其光益瑩自其
進而自得者言之則謂之新自其新而不已者言

之則謂之日新蓋内外交養身心互用確乎其不
拔閤然而日章盡性之功莫備於此豈非蘊蓄之
大者乎要之聖人之學初無二理夫子於乾卦文
言嘗發進修之旨而文王繫艮之象於主靜立極
之義尤為親切大畜之卦則兼乾艮而備焉蓋自
下學立心之始以至達天知命之候古聖人所以
致功者固有先後同揆者也大學之云緝熙敬
止中庸之云純亦不已篤恭不顯其亦與大畜象

傳之意有相為發明者與

周易

君子以多識前言往行以畜其德

侍讀臣周玉章

臣謹按易象小畜大畜俱以畜德言懿文德畜之小者也多識前言往行以畜其德畜之大者也文德者或指其一節之美或統舉其槩而規模小就有斐然成章之意若畜之大者體無不備用無不周固非專長薄殖之可語也然必多識前言往行

者何也古之修德者曰存心養性曰遷善改過曰
主敬存誠不可勝數而其理欲辨晰之介與工夫
從入之門先聖先賢垂之明訓以昭示來學且身
體力行各有明效大驗此前言往行所以炳若日
星也詩言先民是程大猷是經書言學于古訓乃
有獲朱子曰要妙精微各有攸當惟古之聖人為
能盡之其所言所行無不可為天下後世法又曰
以聖賢之學觀聖賢之書人以私意自去求理去

聖賢之心尚遠然則欲畜其德而不取資於前言
往行是却行而求及前人也而識之又貴其多者
性安執復之不一經權常變之各殊觀其會而可
得其通百其慮而仍一其致言之理無或遺而源
流洞徹行之理無或遺而同異互參於以疏濬其
靈明而擴充其詣力使吾德不致有偏而不舉與
雜而不醇之處則其為畜也大矣曾子曰尊其所
聞則高明行其所知則光大所聞所知詎有外於

前言往行哉尊之行之又非特博聞強識而已蓋
蒼萃古聖賢之言行審端擇術設誠而致行之以
馴致於高明光大之域而德之畜也何如乎若夫
天在山中無其事且無其理特取卦象以極言畜
之大耳至多識以畜德則固學問切要之功上自
聖帝明王以及修身砥行之士皆當從事於此者
也

周易

天地養萬物聖人養賢以及萬民

編修臣
喻煒

臣謹按頤之義取乎養非第養其身已也天地以無心而成化帝王以得人而奏功成本此至公無私者旁敷下逮而民與物胥托命焉固有合三才而一致者矣夫自兩儀定位覆載攸司物之負陰抱陽者萬有不齊豈物之克自為養哉風雷動

散六子效能寒暑往來五氣順布莫非為天地彰

其化育之施所以在天成象在地成形剛柔安其
性而靈蠢殊其施也本天親上本地親下洪纖隨
其質而高下適其宜也資始資生不言而美利溥
天地萬物之功夫亦何所不至與雖然天地設位
而聖人成能故天地之大人猶有憾而聖人之德
加於四海要其夙夜圖維所為念茲不置者莫如
養賢為先夫聖人在上三綱正九疇叙五禮修六

樂備郊焉而格廟焉而享固已百姓太和萬物咸
若矣而必亟亟於養賢者其意果何為耶誠以四
海至廣也兆姓至衆也博施則力有所窮獨施則
惠有未遍非得賢以共理雖復焦心勞思終不足
語於光大之治且夫崇效卑法王者之所以奉若
不違也溫肅分其候而仁育義正之兼施燥濕異
其宜而辨物居方之各得天地之養萬物實賴有
為之承流而宣化者賢之於聖何以異是况賢者

匡居圖度其於康濟小民之計無不預籌惟待之以誠推之以澤量才度德而畀以治民之任則賢之大者自能調燮經理以亮天工賢之小者亦能分猷服采以熙庶績將見其於民也養其身尤及其心而授田制產之有法重農積粟之有規建學明倫型仁講讓斯出作入息莫不擊壤歌衢咸拜君王之賜也觀之書曰野無遺賢萬邦咸寧詩曰藹藹王多吉人維天子命媚于庶人周禮大司徒

以保息六養萬民可知古先帝王愛民之政不外
簡俊又以官之此其所以久安而長治也與後世
庸碌者流居官竊祿才慚負乘而覆餗貽譏朝廷
以恤百姓為心而施惠者不無中飽之慮百姓以
望恩為念而請命者或有內壅之憂所養非賢欲
其養及萬民也必無是事矣是以聖王在上慎修
厥德本至公至明之識以招賢士並畜兼收隨才
任使人以漸而用而出類之才則不以漸官以次而

升而切要之職則不以次如是則事之所謂利民
之所謂休將無所不舉事之所謂病民之所謂戚
將無所不除烝我髦士非卽所以惠我嘉師也哉
要之乾坤者萬物之父母聖其合德賢其秀也故
聖為繼述之宗子而賢為佐理之家相惟聖人體
天施地生之心擴民胞物與之量自有以挽氣化
之愆而合撰於清寧九州之內六合之外一道而
同風悉基諸此養賢之典特急其先務耳有平天

下之責者誠能深悉乎頤之義而得養道之正則
裁成輔相立賢無方而澤被蒼生矣

周易

聖人養賢以及萬民

編修臣儲麟趾

臣謹按聖人首出庶物必以天地之心為心天地以養萬物為心故聖人非徒以天下自養而必以養天下為急焉其以天下自養則玉食萬方而不以為過也其以養天下為急則無一夫不被其澤而非勞也是豈必戶授之衣而人賚之粟哉裁成

天地之道輔相天地之宜以左右民順而施之有其序焉遍而普之無或遺焉蓋必至於參天地贊化育而後為養道之極功也易卦大有大畜鼎皆有養賢之義師益井皆有養民之義而頤卦則兼言之曰聖人養賢以及萬民善乎程明道之言曰聖人作養賢才與之共天位使之食天祿俾施澤於天下養賢正所以養萬民也夫生民之初黔首蚩蚩同於鳥獸雖有相生相養之道而不能自為

謀也有聖人者作然後仰觀俯察網罟耒耜舟楫
牛馬宮室烹飪之利次第以興焉而又恐山陬海
徼羣聚州處不能以一人之耳目遍也為之選造
以升之等威以辨之祿糈以優之期以導宣德化
撫循衆庶俾湛恩汪濊無一民一物之流離失業
而後卽安焉是故有憂勞不倦之堯舜而後有已
溺已飢之禹稷而後有日孜日贊之臯夔此固財
之所由以阜愠之所由以解而萬民之所由以熙

熙而皞皞也雖然反而觀之賢者能佐治以養民
不賢者卽能罔上以病民聖人於此公聽並觀見
賢焉則登而庸之見不賢焉仍復屏而斥之流放
誅殛之條與命官分秩之典每並行而不相悖所
以頤之為卦與噬嗑相為表裏頤口中虛九四一
陽間於其中必齧之而後合先王治獄之道存焉
然則聖人之仁育必繼之以義正而後全猶之天
地之春生必濟之以秋殺而後備焉爾後世惟蕭

何言養民致賢以圖天下意亦與此相類而大小不同公私頓異彼就蜀漢一隅言之此則以普天率土而為言也由蕭何之言可以知霸國之勝算由頤卦之彖辭可以識王道之大全意義差類而體用各殊固未可以同年而語也

周易

象曰水洊至習坎君子以常德行習教事

監察御史_臣周祖榮

朱子曰治己治人皆必重習然後熟而安之

程子曰德行當如水之有常教事當如水之洊習

_臣謹按水動機也進必以漸流而不息坎勞卦也


象取重習義在克勤觀於內外皆坎得治己治人之道由內遞及於外者進之漸而有序也修己兼

及於人者功之習而不已也夫足乎已者謂之德
措諸躬者謂之行本德以為行體驗者有據矣而
慮其或間也君子以常心注之平時敬義夾持能
於人不及見處力爭絕續之交雖本體自覺惺然
而日新又新檢身猶若不及則緝熙之學得矣而
德者人所同具修德亦人有同心也聖賢成物之
量原在成己之中吾不能教人卽是德行中有虧
歉處是故本身以立教始而勞來匡直繼以輔翼

其事詳矣又從而振德則功益密焉凡其無所或遺者皆其無所不習也此內外無間而適協乎水洊至之義者也又嘗思之六十四卦中皆言治已治人之法何獨於坎象而對舉其義乎竊謂坎卦中實中實者誠也誠則無息而成已成物之道一以貫之觀彖辭有亨心亨一語首重立誠則知聖人取象蓋本於此或謂常德行習教事為處險之方似猶執於一偏而未會乎立象之本旨矣



御覽經史講義卷五



總校官庶吉士臣侍朝

校對官編修臣楊壽楠

謄錄監生臣葛魏錫